
Kataga ng Buhay

Oktubre 2020

“Sapagkat ang nagpapakataas ay ibababa at ang nagpapakababa ay itataas”

(Lk 14:11)

Malimit banggitin sa Ebanghelyo na malugod na pinauunlakan ni Hesus ang mga paanyaya sa Kanya na dumalo sa isang handaan. Ito ay mga pagkakataon ng pakikisalamuha, pakikipagkaibigan, at pagpapatibay ng mga ugnayan.

Sa talatang ito mula sa Ebanghelyo ni Lucas, pinagmamasdan ni Hesus ang kilos ng mga panauhin. Nag-uunahan silang makaupo sa mga tampok na lugar na nakalaan para sa mga may katungkulan, ramdam ang masidhing paghahangad na makilala ang katayuan nila sa lipunan.

Subalit iniisip Niya ang isa pang piging na nakalaan sa lahat ng mga anak sa bahay ng Ama. Ito ay para sa mga taong walang “nakamtang karapatan” batay sa kataasan ng uri.

Sa katunayan, ang mga tampok na lugar ay ilalaan para sa mga pumili ng huling lugar, sa paglilingkod sa kapwa. Kaya’t ipinahayag Niya:

“Sapagkat ang nagpapakataas ay ibababa at ang nagpapakababa ay itataas.”

Kapag inilagay natin ang sarili sa sentro, na mapansin ng mga tao, at ang ating kasakiman, pagmamataas, pangangailangan at reklamo, nahuhulog tayo sa tukso na sumamba sa mga diyos-diyosang hindi karapat-dapat bigyan ng parangal at tiwala.

Ang unang bagay na hinihingi sa atin ni Hesus ay bumaba sa luklukan ng ating kapalaluan. Pag-ukulan natin ng pansin ang Diyos lamang at hindi ang ating mga sarili. Nararapat na parangalan ang Diyos!

Mahalagang bigyan Siya ng lugar, palalimin ang ugnayan sa Kanya at matutunan ang ugaling ayon sa Ebanghelyo - ilagay ang sarili sa kahulihan. Sa katunayan, ang malayang pagpili sa huling lugar ay pagpili sa lugar na pinili ng Diyos, kay Hesus. Bagamat Siya’y Panginoon, pinili Niyang makibahagi sa ating pagkatao at ihayag ang pagmamahal ng Ama sa lahat.

“Sapagkat ang nagpapakataas ay ibababa at ang nagpapakababa ay itataas.”

Mula dito, matututunan natin kung paano bumuo ng kapatiran, ng isang pamayanan ng lalaki at babae, matanda at bata, malusog at maysakit na may kakayahang gumawa ng tulay at maglingkod para sa kapakanan ng lahat.

Tulad ni Hesus, lapitan natin nang walang takot ang bawat kapwa. Sama-sama tayong maglakad sa panahon ng kahirapan o kasiyahan. Pahalagahan natin ang katangian ng bawat isa at magbahaginan ng materyal at ispirital na bagay. Palakasin natin ang loob ng isa't isa, magbigay ng pag-asa at magpatawad. Makakamit natin ang pinakadakilang pag-ibig at kalayaan bilang mga anak ng Diyos.

Sa ating mundong nais lang ang pansariling tagumpay at siyang sumisira sa lipunan, ang ganitong pagkilos ay tunay na pagsalungat. Ito ay tunay na rebolusyong ayon sa Ebanghelyo.

Ito ang batas ng isang Kristyanong pamayanan, tulad ng sinulat ni apostol Pablo, "May kababaang-loob na pahalagahan ang kapwa nang higit sa sarili."¹

"Sapagkat ang nagpapakataas ay ibababa at ang nagpapakababa ay itataas."

Sinulat ni Chiara Lubich: "Napansin ba ninyo? Sa mundo, ang lahat ay may kakaibang kaayusan. Umiiral ang batas ng pagkamakasarili... at alam natin ang masaklap na bunga nito... kawalan ng katarungan at iba't ibang uri ng kabuktutan. Subalit hindi dito nakatuon ang pansin ni Hesus, kundi sa pinagmumulan nito: ang puso ng tao. Hayaan nating panibaguin Niya ang ating puso upang magkaroon ng bagong pag-uugali na kailangan sa isang wagas at matuwid na ugnayan. Ang pagpapakumbaba ay hindi lamang pagsasantabi ng ambisyon. Ito rin ay pagkilala sa ating sariling kawalan, batid kung gaano tayo kaliit sa harap ng Diyos kaya't dapat ilagay ang ating sarili sa Kanyang mga kamay, tulad ng mga bata...

Paano tayo magpapakumbaba? Tularan si Hesus sa pagkilos nang may pagmamahal sa ating kapwa. Itinuturing ng Diyos na ginawa sa Kanya ang anumang ginawa natin para sa iba. Samakatuwid, pagpapakumbaba, paglilingkod.... At tiyak na tayo ay itataas sa bagong mundo, sa kabilang buhay. Ito ay nangyayari na sa Simbahan. Sa katunayan, ang sinumang may kapangyarihang mag-utos ay kailangang maglingkod sa lahat. Nagbago na ang sitwasyon. Sa ganitong paraan, ang Simbahan, kung saan ang mga katagang ito ay sinasabuhay na, ay isa ng palatandaan ng mundong darating."²

Letizia Magri

Each month the Focolare offers a Scripture passage as a guide and inspiration for daily living.

Distributed in Japan by Focolare:

www.focolare.org/en • www.focolare.org/japan

e-mail: tokyofocfem@gmail.com

Tokyo: 03-3330-5619/03-5370-6424 • Nagasaki: 095-849-3812

¹ cf. Phil.2:3

² Chiara Lubich, Word of Life Oct 1995

